

獨漉堂詩箋

下冊

小禺集原序

小禺番禺二山間一丘也予中年倦於游而食指日繁取資於筆墨遂不能不與人世往來干戈之際又往往以不出見人積爲疑謗歲甲子始卜居茲丘之陽丙寅之冬遂移家焉今不覺十餘年矣會城五方雜處多意外之酬贈故其詩大半入唱和集中間有題詠同而不出於次韻者仍附此集以無虛此歲月自丙寅至戊寅爲小禺初集凡二卷

黎遂球字美周番禺人明天啓丁卯舉人崇禎末詔授兵部
職方司主事乙酉監廣東兵赴贛城破與弟遂琪俱力戰死
贈兵部尚書謚忠愍明史有傳嘗以賦牡丹詩著名人稱牡
丹狀元著有蓮鬚閣集
劉師雄字沛叔番禺人黎遂球姊子少有勇力能敵數十人
喜孫吳兵法以游擊隨遂球援贛州授參將會水師敗遂球
偕師雄入贛身冒矢石督發鐵銃火器目不交睫凡數閱月
城陷遂球巷戰脅中三矢墜馬死師雄被執不屈己而乘間
脫歸隱雷峯卒年八十六
據明史 廣東通志 蓮鬚閣集 番禺縣志

送張超然

相送已云再風花今仲春重尋來日路又老一年人楚水趨吳
遠閩山與越隣便歸何不可詩卷未嘗貧

張遠字超然福建侯官人少孤從母氏受章句遂貫羣經時
海氛未靖軍需旁午戶有逋亡則瓜蔓及親黨遠以孤童懼
此阨亡命吳楚百粵道出江西題詩滕王閣上曹秋岳遇之
大加激賞招入幕所至爲延譽漁洋綿津尤深器重皆引之
爲入室弟子康熙間領鄉薦官祿豐知縣書法晉人著有超
然詩集
據清詩鈔

築室謠和何不偕

杵聲緩杵聲急不畏築牆低只畏囊羞澀牆低有土猶可鋤囊
空人笑不丈夫

少小師前修安能事一室老爲妻子累艱難結蓬華十年遷播
數易居匪自求之天我兀誰憐鳩拙不能巢只聞兔狡存三窟
故人自有屋屋小人日多我已無家四十年偶然卜隱來城阿
同時各有築室歎杵聲橐橐遙相和杵聲緩杵聲急未成仰屋
籌只自面牆立

據先生自序甲子始卜居小禺山舍丙寅冬遂定居焉按禺
山在廣州城東先生故居今已不可考杭世駿主講粵秀書
院有過晚成堂贈陳上舍詩云育賢坊路近喜得半千孫陳
上舍名華封先生幼子適之子晚成堂先生堂名先生初號
半峯後號獨漉所稱半千疑屬筆誤據此則小禺山舍當在
育賢坊也
據道古堂集

寄答華商原時寄示所刻方輿紀要

曾泊端溪共醉歌霜天涼月映藤蓑數莖鶴髮生來早千里魚

書別後多已付形骸同土木尙勞心力紀關河終篇不覺迨然

笑壯志真慚馬伏波

華長發字商原無錫人工詩詞嘗偕顧祖禹纂方輿紀要尤
工行草楷法與孫竑禾高世泰嚴繩孫稱孫高嚴華
據四庫提要 江蘇通志

戊辰正月十日舟泊端州王礎塵自開建適至令子紫巘
招同李蒼水過集高雲客所寓華嚴精舍縱飲達夜卽
事成歌

正月溪山餘暖氣炎方別自爲天地乘興拏舟入峽來故人恰
自康州至客中無地可爲歡高君況在郊南寺落落乾坤數老
翁天涯相見俱憔悴賢郎高燕爲客開李生後至初揮杯登樓
曠望見原野定山數點青崔嵬園桃一樹紅如火折向瓶中如
笑我東風只自戀新枝何處林間尋碩果年當壯盛好努力白
髮生來無一可且燒高燭佛燈前狂歌縱飲開新年東南之美

略已具人間此會非徒然爲君白眼望青天

王礎壁李蒼水見增江後集王紫巘見江村集

高北字雲客侯官人少遭喪亂飄泊四方其後自江左還舊

鄉素衣蔬食塊處蓬室中採撫隱逸輯爲續高士傳其書始

晉皇甫士安迄明穆宗朝去取頗爲不苟

開建縣漢封陽縣地南朝宋置開建縣清屬肇慶府

康州唐置卽今德慶縣

據廣東通志 州郡志 四庫提要

贈別潘稼堂簡討

向來高步渺羣儒名在新篇世莫踰鳳羽尙思翔萬仞鶴書爭
遺下三吳橫竿笠澤江邊臥直宿文昌殿後趨爲見爲潛君並
得天涯相見話菰蘆

去是新秋來是冬一年蹤跡嶺雲中猶同遜世人无悶獨有名

山路未窮採硯每逢蕉葉白買舟頻繫荔支紅羅浮括入歸囊

裏曾否江門夢釣翁白沙先生夢長髯道士以囊貯羅浮遺之

書故用

爲喻

潘耒字次耕號稼堂吳江人師事徐枋顧炎武淹博羣籍工詩文兼長史學康熙中以布衣舉博學鴻詞授檢討纂修明史充日講起居注官以丁母憂歸遂不復出性至孝於師門之誼尤篤炎武著日知錄未及在閩中有贈買山錢者舉以刻之嘗歷游羅浮天台雁宕武夷黃海匡廬嵩岳諸勝其學旁及歷法算數宗乘道藏於聲音反切能通其微晚號止止居士著有遂初堂集據先正事略

九日登鎮海樓

清尊須醉曲欄前飛閣臨秋一浩然五嶺北來峯在地九州南
盡水浮天將開菊蕊黃如酒欲到松風響似泉白首重陽惟有
笑未堪懷古問山川
鎮海樓見江村集

次先司馬韻寄吳爾景

月下論詩夜不眠鯉庭同試鳳山泉平陵歌入千秋史頭白門
人說往年

鳳山在順德縣治西高約十五丈周圍七里
吳朝泗字爾景忠愍公第子忠愍公有寄爾景詩云猶憶寒

江寄旅眠消愁曾仗酒如泉不知峽上程多少一水盈盈十
二年先生此詩卽次該韻者按忠愍公赴金陵上中興政要
疏時途次嘗宿朝泗家賦有雨夜宿吳朝泗江閣一首句云
去家五百里相過重鄉音客路尊前語江流檻外心風連三
峽暗雲隱二禺深莫作登樓賦柴扉尚可尋則朝泗蓋居於
清遠者也

據順德縣志

雪聲堂集

別翁約似廣文

臯比一坐鬢蒼蒼俸入雖微喜近鄉高峽雲山初假館三城風
雨舊同堂康成善飲儀彌謹阮籍能吟醒亦狂還擬花時共沈
醉清溪聊且放歸航

翁邕字約似順德人舉人清康熙二十七年戊辰任肇慶府
教授

據廣東通志

春日王也夔招游蒲澗卽事作

何處春郊布綺筵菖蒲澗口接濂泉竹分山色爲門徑石咽溪
聲似管絃野寺蒼涼懷古地東風晴暖試花天閒來偶共山僧

笑不醉溪橋又五年

蒲澗寺在廣州白雲山麓唐建寺外有蒲澗濂泉相傳安期生以七月二十五日於此上昇宋蘇軾書詩勒石其間

據廣東通志王也夔名籍本末待考

向恬菴携酒西山是日適熱發不得痛飲賦此答謝

誰走銀鞍挈玉壺
西山亭沼對城隅
人言梁國佳公子
僕是高陽舊酒徒
魚戲新荷筒尚卷
月疏楊柳葉全枯
時來望雨憂如渴
清句居然起病夫

西山在順德縣治
向上達字恬菴游宦來順德者
據順德縣志

余兼五招同梁巨圃劉倬之梁耄符劉惇予小飲池亭大
雨適至卽事分賦得花字

旬來憂旱每成嗟
兩度甘霖值爾家
高樹領風多在柳
小池添水半爲花
涼聲入耳能銷酒
香氣浮杯好試茶
况是主人文字

飲篝燈拈韻興何涯

梁巨圖劉惔予名籍本末待考

余錫純字允文號兼五順德人象斗次子以歲貢任陽江訓

導尋歸與時流結社邑城南觴詠無虛日清雍正中總督郝

王麟開局粵秀書院修廣東通志錫純與焉凡八閱月而成

復修清遠縣志皆詳簡有法年九十三猶能書蠅頭小楷時

扁舟挈奚童游行村落間即景成吟著有語山堂集卒年九

十五

劉雲漢字倬之順德人吳三桂之亂盜欲掠其鄉逢簡雲漢

潛出請兵至鄉賴以安兄妹死撫姪甥並如己出弱冠補雲漢

庠康熙丁丑成進士工詩善書都中名流多樂與交學士仇

北鰲尤深器重禮天然和尚爲居士著有清白堂集

梁符祖字奎符順德人梁樾長子習易經不赴試

據順德縣志海雲禪藻集獨漉堂文集粵東詩海

端江五日寫懷

五月牂牁水今年少濁波隄連沙衍出山落石痕多仰食資畚

米均輸恃海嵯東陸膏雨足西土定如何

炎荒爲澤國海舶壯軍威跋浪如山立乘風若電飛雉曾重譯

貢馬已華陽歸恃有長城在南人解鐵衣

江闊山爲岸奔流直向東最愁炎暑月多作石尤風不有藏舟
地徒勞拯溺功可能開別港羈泊免途窮端州城下無港口停泊之所大風作則舟石相觸往往覆溺

厓門三百里洄溯未爲遙西水秋無力南風夜有潮預防聞往

哲列戌自前朝海微波濤地毋云兵已銷

前輩葉石洞謂宜增仰船洋戍兵以固端

州門戶

少日趨庭過中年閉戶居恥爲無用學必讀有源書衰白心徒
苦經綸事已虛客途猶秉燭終恐負居諸

處處弔靈均當年一逐臣跡疏猶戀國道直不謀身日月懸詞
賦風濤泣鬼神湘流殊未極來者又何人

端州爲桂王舊都先生集中重游賦詩甚多顧必有感慨含悲語在此章第五首少日趨庭過中年閉戶居衰白心徒苦經綸事已虛故國之思躍然紙上第六首雖詠屈原實亦自況耳

端州華嚴菴送何孟門陶握山王紫巘游鼎湖

一月江城住茅菴共菜根更尋名勝地仍是給孤園高峽連峯影清溪到院門不能同買棹相送亦難言

尙記登臨日春王正月中冰霜凝野寺燈火徹行宮未續青山夢居然白髮翁鼎湖名尙在惆悵泣遺弓

樓壑大師改鼎湖爲天湖時行在在端也

何孟門卽何不偕見增江前集陶握山卽陶苦子見增江後集王紫巘見江村集

鼎湖山在廣東肇慶府又稱頂湖山與爛柯山對峙樓壑和尚名道邱字離際順德龍山柯氏子憨山禪師法嗣創慶雲寺於鼎湖爲開山祖

據廣東通志

龍山鄉志

己巳九日鎮海樓作

自我移居到南郭登高三上三城北城隅傑閣五層開六合分明在胸臆三江洋洋趨向東五嶺氣與珠厓通青天四垂海波立烟雲變幻生長風故人相約酬佳節歌舞岡前高宴列東西南北一萍逢永嘯長吟各雄傑仙人亭館石爲臺文窗四啓無纖埃木棉古樹垂百仞清陰覆地秋聲來座邊埤垵連天起萬

壘青青皆秀峙龍盤虎踞勢未殊爲霸爲王皆有以昔人歌舞
尙留名今人歌舞不成聲廣武城頭發浩歎千秋阮籍稱狂生
君不見高皇用武平方國百粵懷柔獨文德斯樓結構自初年
其廢其興豈人力雕蕤刻桷此重新地轉天旋多氣色爲君釃
酒興何極半酣起舞忘頭白倚天長劍又何人側身四望乾坤
窄

鎮海樓見江村集

歌舞岡南越王趙佗三月三日登高處廣州府城堞因山
分爲二東爲歌舞岡越王臺西爲觀音閣山半爲呼鑾道漢
劉龔故蹟也山踞粵城最高處憑高下瞰遠江如帶目盡炎
海粵人三月三日九月九日多游於此城堞間多榕樹木棉
廣州城始築自越人公師隅曰南武城其後迭經增廢府城
後倚粵秀前臨珠江舊有三城明洪武十三年永嘉侯朱亮
祖以舊城低隘請連三城爲一闢東北山麓以廣之
據廣東通志 王士禎廣州游覽小志

輓張桐君

舉世醒皆醉斯人邇亦遐五車梁惠子七葉漢張家每有乘桴

歎常深彼黍嗟乾坤無故國白首尙天涯

北海開尊久南溟世澤深萍蓬無定聚松竹本同林未免艱虞
日多承繾綣心夜臺今不作寂寞歎人琴

燈下文猶草宵中館已捐有生終是化無疾卽爲仙允子來千
里歸舟動隔年知君丈夫志不死女兒邊

交君兄與弟並是廿年前五嶺非深阻雙棺乃後先長途號白
馬中夜泣啼鵑慟絕南州客貧無絮酒錢令兄南士名

張桐君見江村集張南士見增江後集
按張南士於康熙十九年庚申以猶子官廣東鹽提舉過其
任疾卒今此詩云五嶺非深阻雙棺乃後先則桐君亦卒於
粵也

據毛奇齡張南士墓誌

寄懷王阮亭兼索其南海集

酷似高人王右丞在官蕭散意如冰時名兄弟堪方駕家學文
章是一燈滄海乘槎曾獨到越山懷古記同登南來新詠多如

許紙貴衡陽寫未能

王阮亭見江村集

按阮亭有兄三人長士祿號西樵順治進士官吏部考工員外郎工詩著有司勳五種集讀史蒙拾炊聞詞次士禧字禮吉以歲貢終著有掄山集選次士祐號東亭康熙進士十歲時客有疑焦竑字弱侯者應曰此考工記竑其輻廣以爲之弱也舉座驚其夙慧著有古鉢山人集所謂時名兄弟堪方駕家學文章是一燈者也

又精華錄中載有答陳元孝寄懷一首云不見閉門陳正字嶺雲江樹五年餘秋風欲下華陽館粵客纔通尺素書蒲澗紅泉應不改羅浮翠羽夢全疏天南耆舊今頭白珍重新詩獨起予

據四庫提要

漁洋精華錄

題甘衷素小影

青松白石不沾塵野服科頭意自真一坐空山非易得十年南
北倦游人

甘表字衷素南豐人曾從其父京游程山易堂間李振裕甘國樞交薦不就遂返了溪不復出著有膜堂存稿逸民傳據江西詩徵明遺民詩詠

續王礎塵少萊子歌爲屈翁山壽

老萊子有五色衣少萊子有五色筆衣舞斑斕有盡時筆飛青
簡無窮日每常中夜起雞聲亦曾草檄母窺屏子年六十母九
十母頭全白子全青階前幼稚立四五長者能文少者語人生
快意豈在多莫惜堆盤獻雞黍君不見叔皮避地河西居王命
論成還著書漢家紀傳定義例作者何必皆石渠平津六十初
應詔再至太常方見召奇才偉貌衆所推得君何必皆年少君
家有書非野史碧血熒熒光透紙筆端生氣萬古存君與人人
皆不死少萊子老布衣世人好惡多是非三閭之後若無子日
月誰與爭光輝請簪此筆立殿陛可以上報三春暉

屈翁山王礎塵並詳增江後集

按子年六十母九十又云平津六十初應詔則此詩當是壽
屈翁山六十作矣考翁山倦游還鄉開九歌草堂奉其母黃
太夫人以居翁山長先生一歲六十之年則康熙二十八年
己巳也君家有書非野史碧血熒熒光透紙筆端生氣萬古
存君與人人皆不死蓋指翁山撰四朝成仁錄而言

送李孝先之蘄州扶其先大夫相如先生旅櫬歸粵

滇楚千峯斷當年立馬看那堪亡國淚還灑故人棺彭蠡扁舟
小凌江素旄寒首邱憑孺子辛苦涉驚瀾

四十年長別三千里寄居生時知有子歸日已無書老僕尋先
塚荒畚繞舊廬要離雖可近未若返於初

惜汝風塵早艱虞及弱齡誦詩悲陟岵聞禮夢趨庭剝極終來
復藍深或出青蘄黃張楚地早願返松扃

李相如見增江後集
李仁字孝先相如子王蒲衣之婿四會人太學生著有借堂
偶編

據粵東詩海

送何孟門之瓊州

曾歌燕筑金臺上又泛珠厓大海中老脚天涯殊復健白頭吾
道未終窮首春問路纖纖草二月揚帆細細風此去鄉南更千
里好音惟恨隔郵筒

何孟門即何不偕見增江前集